

Chris Eazy n'Umujyanama we bashyikirijwe Ubushinjacyaha

April 6, 2023

Nsengimana Rukundo Christian uzwi nka **Chriss Eazy** nk'Umuhanzi, we n'Umujyanama we Junior Giti, bamaze gukorera dosiye n'Urwego rw'Igihugu rw'Ubugenzacyaha (RIB), ishyikirizwa Ubushinjacyaha, aho bombi bashinjwa Inyandiko mpimbano zishingiye ku Gitaramo uyu Muhanzi atitabiriye.

Iki kirego kiregwamo Nsengimana Rukundo Chistian uzwi nka Chris Eazy, ndetse na Bugingo Bony uzwi nka Junior Giti usanzwe areberera inyungu ze, ndetse n'umuganga witwa Dr. Ngoboka Dervey.

Baregwa icyaha cyo gukora cyangwa gukoresha inyandiko mpimbano y'icyangombwa kigaragaza ko uyu muhanzi afite ikiruhuko cy'uburwayi, bivugwa ko ari icyo kugaragaza impamvu uyu muhanzi atitabiriye igitaramo yari yatumiwemo.

Uru rubanza ruregwamo Chris Eazy, rushingiye ku kuba uyu muhanzi yaragombaga gukorera igitaramo muri Hoteli imwe y'i Musanze muri Mutarama uyu mwaka, ariko ntakitabire.

Umuyobozi w'iyi Hoteli yahise atanga ikirego avuga ko bari bishyuye igice kimwe cy'ubwishyu bwagombaga guhabwa uyu muhanzi kingana n'ibihumbi 500 Frw, bagasaba ko bayasubizwa.

Gusa Junior Giti yavugaga ko ayo mafaranga bayasubije, ndetse bakavuga ko uyu muhanzi Chris Eazy yari arwaye ubwo iki gitaramo cyabaga, ndetse ko banafite impapuro bakuye kwa muganga.

Nyuma byaje kugaragara ko izo mpapuro z'ikiruhuko cya muganga cyahawe uyu muhanzi, ari impimbano, ari na byo byaje kuvamo iki kirego gishya cyakurikiranywe n'Urwego rw'Igihugu rw'Ubugenzacyaha (RIB) rwemeje ko rwamaze no gukora dosiye

rukayishyikiriza Ubushinjacyaha.

Umuvugizi w'uru Rwego, Dr. Murangira B. Thierry, yagize ati "Dosiye yabo uko ari batatu yoherejwe mu Bushinjacyaha ku itariki ya 03 Mata 2023."

Dr Murangira avuga ko aba bose uko ari batatu barimo umuhanzi Chris Eazy ndetse na Junior Giti "Bakurikiranywe badafunze."

Hari amakuru avuga kandi ko umuganga watanze ruriya rwandiko rugaragaza ko Chris Eazy arwaye, yemereye inzego z'Ubugenzacyaha ko yarutanze atabonanye n'umurwayi.

Ibyaha Junior Giti na Chris Eazy bakurikiranyweho bihanwa n'ingingo ya 276 y'itegeko riteganya ibyaha n'ibihano muri rusange.

Iyi ngingo iteganya ko baramutse babihamijwe n'Urukiko bahanishwa igihano cy'igifungo kitari munsi y'imyaka itanu ariko kitarengeje irindwi n'ihazabu y'amafaranga atari munsi ya miliyoni eshatu ariko atarengeje miliyoni eshanu cyangwa kimwe muri ibyo bihano.